

急公好義之誠有爲人所難能者既據呈請代奏不敢壅於上聞合無仰懇 天恩俯准 賞給該署撫臣程德全三代正一品封典以資觀感而勵成勞出自 高厚鴻慈所有據情代奏緣由謹

恭摺具陳伏乞

皇太后

皇上聖鑒訓示謹

奏光緒三十四年三月十五日奉

硃批著

照所請該部知道欽此

署東撫吳衍聖公孔會奏稽查濟南等處學務摺

奏爲稽查山東濟南泰安兗州濟寧州四屬學務事訖先行恭摺會陳仰祈

聖鑒竊臣令貽奉

命會同山東巡撫稽查本省學務於上年五月間請

訓出京六月初二日馳抵山東省城業將到差

日期 奏報在案是時正值各學堂暑假休課無從參觀遂與正任撫臣楊士驥研究學務辦法並調查

本省辦學各項案卷竊維育材之道以培植根本爲先辦學之方以考覈實際爲主東西各國於學術進

步之事彼此擇善而師然於本國獨擅優勝之學賴之團結國家人民者學校中必注意教授弗使失傳

故新學新理互相發明而其國民性質雖經各種陶染宗旨屹不少變中國數千年來以文學經術立國

垂教久遠現雖設立學堂於圖算理化各科史迹時務等事分門講肄期於一變從前固陋養成通達之

材使非文學經術確有造詣雖科學得有門徑亦惟習其藝而昧其理知其細而忘其大則改良學校之

謂何哉至辦學經費皆由公私籌集必須會計精詳勿使浮濫庶足以推廣教育收隨地興學之效臣令

貽抱此意見於八月間會同臣廷斌分期周歷省城所設各項學堂於功課則注重經史國文於規制則

兼核度支各事前署提學使試用道方燕年曾兩次出洋考查學務洞悉教理現署提學使羅正鈞亦曾

出洋才學精實到任以來循舊接辦故各校監督堂長等於教授管理均能盡心任事雖規模形式較外

國或有繁簡之分而教育精神斐然可觀者已占多數臣令貽稽查省城各學堂事竣卽由省由泰安府

而濟甯州而兗州府一路參觀調查每到一處學堂必照所持宗旨悉心考核並取生徒所習講義及所課文字細加觀覽其有授受不合者隨示以改良之方而經費出入亦必核其簿記逐款諮詢至所屬各州縣學堂由臣等會同遴委諳習學務人員分往稽查使於各處之學堂名稱校員之出身名籍及所任之課目時間學生人數班數校中有無產業及出入分銷之各項詳數逐一填駐統計表並使加以議論彙核報告臣令貽於十一月十五日將三府一直隸州學堂查訖其分查四屬州縣委員則因途間風雪時作馳驅往返不無稽遲至封印前始據先後稟覆前來臣等綜核四屬所設學堂辦理悉遵定章學生亦無浮囂習氣以濟南泰安兩屬爲較優餘皆逐漸擴充力求進步現在值各校均已開學臣令貽抵省與臣廷斌會商一切擬卽續行按府稽查隨時相度情形籌畫改良總期實事求是俾學務日有起色以仰副 朝廷作育人材之至意所有臣等年前稽查濟南泰安兗州濟州四屬學務緣由謹合詞恭摺具陳伏乞 皇太后 皇上聖鑒訓示再此摺係臣令貽主稿合併陳明謹 奏光緒三十四年三月十四日奉 硃批學部知道欽此

護川督趙奏請以白懷慶承襲土百戶片

再查土官襲職例應取具各結宗圖及原領號紙送部具奏請襲嫡庶不得越序無子者許弟襲本族無可襲職者或妻或婿爲衆信服者亦准承襲茲據布政使許涵度詳稱慶遠府鹽源縣屬後所土百戶白懷馨因染患瘋病久治不愈實難任事並無子嗣其妻白熊氏係屬漢人不通夷語不能護理恐誤公件稟請辭退所遺之缺選得白懷馨胞弟白懷慶現年三十五歲係前已故土司白廷珊之次子堪以承襲兄職大小頭人夷衆隣封均各悅服照例造具宗圖冊結由該管縣府道核明層轉加結請 奏前來奴才覆覈無異合無仰懇 天恩俯准以白懷慶承襲鹽源縣屬後所土百戶之職 敕部換頒號紙